

SIARAN MEDIA

MERENTASI SEMPADAN: MENJALINKERJASAMA GLOBAL MELALUI PROGRAM MOBILITI PELAJAR INDIA-MALAYSIA DI POLITEKNIK UNGKU OMAR

IPOH, 2 April - Politeknik Ungku Omar (PUO) telah menjadi tuan rumah bagi Program Mobiliti Pelajar Antarabangsa India ke Malaysia selama hampir enam hari, bermula pada 26 Mac sehingga 1 April 2023. Objektif utama program ini adalah bagi meningkatkan pengetahuan para pelajar melalui kaedah pembelajaran berasaskan pengalaman dan memberi pendedahan kepada kepelbagaian aspek budaya, pendidikan dan ekologi negara lain dalam membentuk minda global serta mempersiapkan mereka untuk peningkatan kerjaya di masa hadapan.

Delegasi yang terdiri daripada tiga orang pensyarah dan tiga puluh orang pelajar dari Dr. M.G.R Educational and Research Institute dan Francis Xavier Engineering College telah menyertai program ini di bawah pimpinan Profesor Dr K Balasubramian. Selama berada di PUO, para pelajar telah mengambil bahagian dalam pelbagai aktiviti seperti taklimat mengenai program TVET di Malaysia, lawatan ke makmal akademik PUO seperti Jabatan Kejuruteraan Elektrik dan Jabatan Kejuruteraan Perkapalan, sesi perkongsian ilmu bersama pensyarah Politeknik Ungku Omar, serta lawatan ke lokasi-lokasi menarik di sekitar bandar raya Ipoh. Para pelajar turut diperkenalkan dengan kebudayaan Malaysia melalui permainan tradisional dan kelas tarian kebudayaan.

Majlis Penutup Program Mobiliti Pelajar Antarabangsa India-Malaysia telah berlangsung pada 31 Mac 2023 (Jumaat) yang disempurnakan oleh YBrs. Encik Mohd Noor bin Shahudin, Pengarah Kanan (Akademik) Jabatan Pendidikan Politeknik dan Kolej

Komuniti. Program ini diharapkan dapat memberi manfaat kepada peserta dan meningkatkan lagi hubungan antara India dan Malaysia dalam bidang pendidikan dan kebudayaan. PUO turut berharap dapat meneruskan usaha-usaha ini dan melaksanakan lebih banyak program mobiliti seumpama ini di masa depan.

Rata-rata para peserta menzahirkan kegembiraan dan penghargaan kepada kerajaan Malaysia yang telah sudi menerima dan mengaturkan program ini sebagai satu usaha melestarikan proses pertukaran ilmu serta mencetuskan hubungan kerjasama baharu dalam industri TVET. PUO turut menyambut baik inisiatif kolaborasi ini dan berharap agar aktiviti seumpama ini mampu memberi nilai tambah kepada usaha negara untuk memperkasakan program TVET.

PUO, Home of TVET Champions.

Politeknik Ungku Omar
1 April 2023